

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԵՐԵՎԱՆ ՔԱՂԱՔԻ ԱՎԱԳԱՆԻ**

«__»_____2026թ.

N_____-Ն

ՈՐՈՇՈՒՄ

**ԵՐԵՎԱՆ ՔԱՂԱՔԻ ԱՎԱԳԱՆՈՒ 2009 ԹՎԱԿԱՆԻ ՀՈՒՆԻՍԻ 18-Ի N 1-Ն
ՈՐՈՇՄԱՆ ՄԵՋ ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ**

Ղեկավարվելով «Նորմատիվ իրավական ակտերի մասին» օրենքի 33-րդ և 34-րդ հոդվածներով՝

Երևան քաղաքի ավագանին որոշում է.

1. Երևան քաղաքի ավագանու 2009 թվականի հունիսի 18-ի «Երևան քաղաքի ավագանու կանոնակարգը ընդունելու մասին» N 1-Ն որոշման (այսուհետ՝ Որոշում) մեջ կատարել հետևյալ փոփոխությունները.

1) Որոշման նախաբանում «12-րդ հոդվածի» բառերը փոխարինել «8-րդ հոդվածի» բառերով.

2) Որոշմամբ հաստատված հավելվածի (այսուհետ՝ Հավելված) ամբողջ տեքստում «աշխատակազմի քարտուղար» բառերը և դրանց համապատասխան հոլովաձևերը փոխարինել «աշխատակազմի ղեկավար» բառերով և դրանց համապատասխան հոլովաձևերով.

3) Հավելվածի 18-րդ կետի 1-ին նախադասությունը շարադրել հետևյալ խմբագրությամբ.

«Ավագանու նիստերի օրակարգը նիստից առնվազն երկու շաբաթ առաջ կազմում և հաստատում է Քաղաքապետը:».

4) Հավելվածի 23-րդ կետի վերջին նախադասությունը շարադրել հետևյալ խմբագրությամբ.

«Անհետաձգելի համարվող նախագիծը հեղինակի կողմից կարող է լրամշակվել և ներկայացվել նիստը վարողին մինչև նշված հարցի քվեարկությունը:».

5) Հավելվածի 71-րդ կետի 2-րդ ենթակետը շարադրել հետևյալ խմբագրությամբ.

«2) նիստը վարողը հրապարակում է նիստին ներկա Ավագանու անդամների թվաքանակը: Եթե գրանցված ավագանու անդամների թիվը նիստի իրավագործության համար բավարար չէ, ապա գրանցումը շարունակվում է մինչև անհրաժեշտ թվով ավագանու անդամների գրանցվելը, բայց ոչ ավելի, քան երկու ժամ: Նշված ժամկետում նիստի իրավագործության ապահովման դեպքում նիստը վարողն ավագանու անդամներին տեղեկացնում է նիստը սկսվելու մասին, իսկ չապահովման դեպքում հերթական կամ արտահերթ նիստերը համարվում են չկայացած.».

6) Հավելվածի 71-րդ կետի 3-րդ ենթակետում «օրակարգի նախագիծը» բառերը փոխարինել «օրակարգը» բառով.

7) Հավելվածի 71-րդ կետի 5-րդ ենթակետում «հերթական նիստի օրակարգի հաստատումից» բառերը փոխարինել «առաջարկությունների քննարկումից» բառերով:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

ԵՐԵՎԱՆԻ ՔԱՂԱՔԱՊԵՏ՝

ՏԻԳՐԱՆ ԱՎԻՆՅԱՆ

ՀԻՄՆԱՎՈՐՈՒՄ
«ԵՐԵՎԱՆ ՔԱՂԱՔԻ ԱՎԱԳԱՆՈՒ 2009 ԹՎԱԿԱՆԻ ՀՈՒՆԻՍԻ 18-Ի N 1-Ն
ՈՐՈՇՄԱՆ ՄԵՋ ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ» ԵՐԵՎԱՆ
ՔԱՂԱՔԻ ԱՎԱԳԱՆՈՒ ՈՐՈՇՄԱՆ ՆԱԽԱԳԾԻ ԸՆԴՈՒՆՄԱՆ
ԱՆՀՐԱԺԵՇՏՈՒԹՅԱՆ

Ընթացիկ իրավիճակը, իրավական ակտի ընդունման անհրաժեշտությունը, առկա խնդիրների առաջարկվող լուծումները.

Հիմք ընդունելով առ 30.08.2026 թվականի խմբագրությամբ գործող «Երևան քաղաքում տեղական ինքնակառավարման մասին» օրենքի 12-րդ հոդվածի 1-ին մասի 1-ին կետը Երևան քաղաքի ավագանին 2009 թվականի հունիսի 18-ի թիվ 1-Ն որոշմամբ ընդունել է Երևան քաղաքի ավագանու կանոնակարգը:

2026 թվականի հուլիսի 3-ին ընդունված և նույն թվականի օգոստոսի 30-ին ուժի մեջ մտած «Երևան քաղաքում տեղական ինքնակառավարման մասին» օրենքում փոփոխություն կատարելու մասին» ՀՕ-387-Ն օրենքով «Երևան քաղաքում տեղական ինքնակառավարման մասին» օրենքը շարադրվել է նոր խմբագրությամբ: Նշված փոփոխության արդյունքում փոփոխվել են վերոնշյալ օրենքի հոդվածների և դրույթների համարակալումները, Երևանի ավագանու նիստի օրակարգի ընդունման ընթացակարգը, ինչպես նաև Երևանի քաղաքապետարանի աշխատակազմի քարտուղարն այդ օրենքի և հարակից՝ «Համայնքային ծառայության մասին» օրենքում կատարված փոփոխության ուժով փոխվել է Երևանի քաղաքապետարանի աշխատակազմի ղեկավար:

Ելնելով վերոգրյալից, Նախագծով առաջարկվում է Երևանի քաղաքի ավագանու 2009 թվականի հունիսի 18-ի N 1-Ն որոշումը համապատասխանեցնել գործող «Երևան քաղաքում տեղական ինքնակառավարման մասին» օրենքի պահանջներին:

ԵՐԵՎԱՆԻ ՔԱՂԱՔԱՊԵՏ՝

ՏԻԳՐԱՆ ԱՎԻՆՅԱՆ